

galia; et era amalato, *tamen* era risanato, e partiria subito per Alexandria. *Etiã* esso Sagudino, secretario, scrive in conformità.

Da Constantinopoli, di sier Lunardo Bembo, baylo, di 24 octubrio. Zercha cosse particular; et quello à operato con li bassà. Et li esser bon mercha' di formenti. *Alia*, 0 da conto.

Di Spagna, più letere, di sier Francesco Donado, orator nostro, date a Salamanca; et l'ultime sono de Avisa, come l'archiducha, o ver re di Chastiglia, par voi venir in Spagna; et si praticia acordo; et che quel re à bona mente contra la Signoria nostra. *Item*, come de li si preparava armata a quelle marine, di velle 200, per ultimar l'impresa di la Barbaria. *Item*, che a di primo novembre ivi era stà *publice* proclamà la pace e liga tra quel re e il re di Franza, per causa di le noze, come ho scritto di sopra. *Item*, vidi una letera, di 4 octubrio, di Lisbona, zercha le cosse di Coloquut, qual non fo leta im pregadi, ma ben il sumario scriverò qui avanti.

Di Elemagna, di sier Francesco Capelo, el cavalier, orator nostro, qual vien a ripatriar, date in Yspurch. Dil zonzer suo li, honorato da quelli prescidenti, et presentato di uno cavriol e una barila di ribuola; et si mete a camino per qui.

Da Roma, di primo. Come el pontifice, in concistorio, in quel zorno, intrati a hore 17, stete fino le 23, in materia di far cardinali. Dove fo gran contrasto; a la fine otene la electione di 9 cardinali in tutto, la nome sarà qui soto posta, da esser promossi queste tempore, che sarà a di 19 di l'istante. Et li cardinali fono molti contrarij, pur il papa otene; et non à fato niun a compiacentia di alcun potentato, ma *solum* di lui. *Item*, esser ritornà quel nontio dil papa, fo in Franza, con la instruction ho scripto di sopra. *Item*, par il papa habbi mandato a dir a la prefetessa di Sinigaja, e sorela dil ducha di Urbin, che 'l non vol più lei governi il stato di suo fiol; la qual si vol partir di Sinigaja o ver dove la sta.

9 cardinali, prononciati per Julio 2.º papa, a di primo dezembrio 1505, in concistorio.

Lo episcopo di Senegaja, castelano di castel Sant' Angelo, frate di San Francesco, genoese.

Lo episcopo aginense, nepote dil papa, genoese.

Lo episcopo di Renes, bertom, orator francese, et *de familia pontificis*.

Lo episcopo de Augubio, maistro de caxa del papa, genoese, da Savona.

Lo episcopo de Pavia, thesauriero dil papa, di natione di Castel da Rio, soto Ymola.

Lo episcopo de Urbino, secretario del papa, nominato missier Cabriel da Fano.

Lo episcopo de Cesena, datario del papa, nominato missier Facio da Viterbo.

Lo marchexe del Final, genoese, da Savona.

Lo fratello dil marchexe di Mantoa, prothonotario.

Nomina subrogatorum.

Domino Piero Paulo da Caglij, castellano.

Domino Rolando dal Careto, maestro di caxa.

Lo arziepiscopo tarentino, thesorier.

Domino Zuan Gozadino, clerico di camera, datario.

In questo pregadi, a di 4 dezembrio, fu posto, per sier Marco Antonio Calbo, sier Piero Antonio Morexini, et sier Alvisè Foscarei, savij ai ordeni, che le sede sono in Cypro stà portate, possino esser condute qui con le nave, pagando i nollì a le galie, *juxta* le parte. A l'incontro sier Alvisè Beneto, savio ai ordeni, messe indusiar fino zonzi le nove di le cenere, per le qual si aria letere fresche di Damasco, e si potrà meter le galie di Baruto. Or il Calbo volse parlar; et la parte andò, et fu presa.

Noto, el principe fè la relation al pregadi di la preposta di oratori dil re di romani, *ut patet alibi*; et posto, per li savij, la risposta d'acordo, et balotata, et presa.

Fu posto la parte di vini, per sier Lunardo Grimani, savio dil consejo, per Marin Zustignan, sier Hironimo Capello, savij di terra ferma, et 3 savij ai ordeni, di revochar la parte di vini, et redur la parte si come era 1486. Or parlò contra sier Antonio Trun, 121 savio dil consejo, et fè lezer molte parte, tra le qual alcune poste per mi, quando era ai ordeni; li rispose sier Hironimo Capello. Or il Trun messe di indusiar; e in questo mezo si scriva in Candia, che mandino li soi oratori a dir le so raxon; et il Capello volse per lui sollo meter la revocation di la parte. El resto di savij messe de indusiar; et che marti si chiami il consejo per ultimar tal materie, et tutti di collegio vengi con le sue opinion. Or andò queste 3 parte: 16 dil Capello, 36 dil Trun, el resto indusiar.

Morite in questo zorno Hironimo Zenoa, era capetanio di Rialto, homo assa' nominato, perhò ò voluto far memoria.

A di 5 dezembrio. La matina fo publicà certa parte, presa nel consejo di X, zercha le provision di fuogi; et far un zenthilomo e uno popular per con-